

# OBAIDIÁ

## Tús

<sup>1</sup> Fís Obaidiá.

Mar seo a deir an Tiarna faoi Eadóm;  
tá scéal faoi cloiste againn ón Tiarna,  
agus tá teachtaire seolta i measc na náisiún.  
“Suas linn! Ar aghaidh chun catha linn ina choinne!”

## Daorbhreith ar Eadóm

<sup>2</sup> “Déanfaidh mé beag thú, féach, i measc na náisiún;  
beidh tarcaisne ort ag daoine.

<sup>3</sup> Chuir uail do chroí ar seachrán thú,  
thusa a chónaíonn i scailp na carraige,  
a bhfuil [na hardáin] mar áit lonnaithe agat,  
a deir i do chroí:  
‘Cé a thabharfaidh síos chun talún mé?’



<sup>4</sup> Cé go n-éireofá san aer mar iolar,  
 agus do nead a dhéanamh i measc na réaltaí,  
 theilgfinnse síos as sin thú,”  
 a deir an Tiarna.

## Díothú Eadóm

<sup>5</sup> “Dá dtiocfadh robálaithe chugat  
 nó sladairí san oíche –  
 cad é mar scrios a dhéanfaidís ort! –  
 nár leor mar shlad acu a ndóthain féin?  
 Dá dtiocfadh lucht bainte caor,  
 nach bhfágfaidís caora díolama?”

<sup>6</sup> Cad é mar a creachadh Éasau!  
 rinneadh slad ar a sheoda.

<sup>7</sup> Mheall do chomhghuaillithe go léir thú!  
 thiomáin siad go himill do chríoch thú.  
 Fuair do pháirtithe an lámh in uachtar ort;  
 chuir do chairde as a raibh do mhuinín gaiste romhat.  
 – ‘Níl aon eagna fágtha aige.’

<sup>8</sup> Nach scriosfaidh mé, a deir an Tiarna,  
 na saoithe as Eadóm an lá sin?



agus an eagna as Sliabh Éasau.

<sup>9</sup>Beidh uafás ar do churaidh, a Théamán,  
i dtreo go ndíothófar gach duine ó Shliabh Éasau.”

## Ciontacht Eadóm

<sup>10</sup>“Beidh brat náire ort faoin bhforéigean  
a rinneadh ar do bhráthair Iósaef,  
agus rachaidh tú ar ceal go brách.

<sup>11</sup>An lá a sheas tú i leataobh  
an lá a rug strainséirí a mhaoin leo,  
agus a ghabh coigríochaigh a gheataí isteach,  
agus a chuir siad Iarúsailéim ar chrainn,  
ba gheall le duine díobh thú.

<sup>12</sup>Ach b’olc an mhaise duit gur gheal leat  
cás do bhráthar lá a mhí-áidh;  
go ndearna tú lúcháir faoi mhuintir Iúdá,  
lá a mífhortúin,  
agus maíomh lá na duainéise.

<sup>13</sup>B’olc an mhaise duit go ndeachaigh tú geata mo phobail isteach,  
lá a mhillte,  
gur gheal leat a thubaiste,



lá a mhillte,  
 agus go ndearna tú creach ar a mhaoin,  
 lá a mhillte.

- <sup>14</sup> B’olc an mhaise duit gur sheas tú ag gabhal an bhóthair  
 lena theifigh a theanntú;  
 gur thug tú fuíoll an áir ar láimh,  
 lá a dhuainéise.”

## Lá an Tiarna

- <sup>15</sup> Óir tá lá an Tiarna ar an tairseach ag na náisiúin go léir;  
 mar a rinne tú leo, déanfar leat;  
 fillfidh do bhearta ar do mhullach.
- <sup>16</sup> Faoi mar a d’ól tusa ar mo shliabh naofa  
 ólfaidh na náisiúin go léir mórthimpeall;  
 ólfaidh siad agus beidh na cosa ag imeacht uathu,  
 agus rachaidh siad ar ceal amhail is nach raibh siad riamh ann.
- <sup>17</sup> Ach ar Shliabh Shíón, fágfar fuíoll a thiocfaidh slán,  
 agus beidh siad naofa;  
 agus gheobhaidh teach Iacóib seilbh ar a shealúchas féin.
- <sup>18</sup> Beidh teach Iacóib ina thine,  
 agus teach Iósaef ina lasair;



agus teach Éasau ina choinleach.  
Cuirfear trí thine iad, agus loiscfear iad,  
agus ní fhágfar duine de theach Éasau beo.  
Tá an Tiarna tar éis labhairt.”

## Iosrael Nua

<sup>19</sup>“Beidh seilbh ag lucht an Neigib ar Shliabh Éasau, agus ag lucht na nÍsleán ar thír na bhFílistíneach; beidh seilbh acu ar thír Eafráim, agus ar thír na Samáire, agus beidh seilbh ag Biniáimin ar Ghileád, <sup>20</sup>Deoraithe an airm seo, clann Iosrael, beidh seilbh acu ar Fhéinicia, chomh fada le Zaráfat. Na deoraithe ó Iarúsailéim, atá in Safárat, beidh seilbh acu ar bhailte an Neigib. <sup>21</sup>Rachaidh lucht ceannais suas go Sliabh Shíón, le Sliabh Éasau a rialú, agus beidh an Tiarna i réim.”

